

28 AUG 2003

Mahathir-Acheh

MALAYSIA TAK AKAN BERI SUAKA POLITIK KEPADA PELARIAN ACHEH, KATA DR MAHATHIR

KUCHING, 28 Ogos (Bernama) -- Datuk Seri Dr Mahathir Mohamad berkata Malaysia tidak akan memberi suaka politik kepada pelarian dari Acheh.

Sebaliknya, kata Perdana Menteri, Malaysia menganggap mereka sebagai pendatang tanpa izin dan akan mengenakan tindakan terhadap mereka sebagaimana rakyat pendatang tanpa izin yang lain.

"Kita tak ada suaka politik bagi pelarian dari Acheh...mereka hanya menjadi pendatang tanpa izin dan mereka akan dimasukkan dalam tahanan," katanya ketika menjawab soalan wartawan pada persidangan berita bersama dengan Presiden Indonesia, Megawati Soekarnoputri di sini, hari ini.

Kedua-dua pemimpin sebelum itu menghadiri perundingan tahunan Malaysia-Indonesia.

Pada 19 Ogos lepas, pihak berkuasa Malaysia telah menahan 232 rakyat Acheh di Kuala Lumpur. Beberapa orang daripada mereka dilaporkan mahu mendapatkan suaka politik manakala yang lain merupakan pelarian yang ingin mendapatkan pekerjaan.

Menteri Luar Indonesia Hassan Wirajuda, yang turut mengiringi Megawati ke sini, ketika ditemui pemberita, menyambut baik pendirian Malaysia itu.

"Malaysia selaku negara yang berdaulat (telah) memutuskan bahawa siapapun warga asing yang tinggal di Malaysia tanpa izin akan dipulangkan ke negara asal. Dalam hal ini Indonesia pun akan melakukan hal yang sama terhadap warganegara asing yang tinggal secara tidak sah," katanya.

Menjawab satu soalan sama ada terdapat antara kalangan mereka yang ditahan itu anggota Gerakan Acheh Merdeka (GAM), Hassan berkata, persoalan pokok dalam isu itu ialah sama ada mereka memasuki Malaysia secara sah atau sebaliknya.

"Bagi Malaysia, tentunya persoalan sama ada mereka (anggota) GAM atau tidak GAM, siapapun warga asing yang tinggal secara tidak sah, akan dihantar pulang," katanya.

Walau apapun keadaannya, Hassan berkata, kehadiran rakyat dari wilayah itu bukan disebabkan operasi bersepadu yang dilakukan di Acheh sekarang ini.

"Jadi tiada hubungannya antara kedua-dua perkara itu," katanya.

-- BERNAMA

JS MAI